

La minoritad dat la decisiun

Pajais federativ tudestg cun ministra «danaisa»

■ (gsc) **Dapi 1949 è il Schleswig-Holstein (oz passa 2,8 milliuns olmas) in pajais federativ da la Germania, l'unic tranter duas mars, l'unic cun duas minoritads etnicas istoricas, quella da lingua danaisa (var 50 000), per lung dal cunfin nord, e quella da la Frisia dal nord (var 10 000) sper il Mar dal nord e sin sias inslas.** Il pajais ha survegnì il num da dus anteriurs ducadis subdits da la curuna danaisa durant tschientaners, sut il motto da 1460 en il vegl linguatg «tudestg bass» da la Hansa: «Up ewig ungedeelt» («Unids per l'eternitad»). Il Holstein tanscheva fin a las portas da Hamburg, citad libra da la Hansa. Il Schleswig, a nord da Kiel, cumpigliava er in toc dal Danemarc actual. Cun las guerras da 1864 e 1866 ha la Prussia annectà ils dus ducadis, pia era la part etnicamain danaisa da Schleswig. Suenter l'Emprima guerra mundiala ha la Societad da las nazius arranschà votaziuns popularas per fixar in cunfin democratic tranter Danemarc e Germania. Ils dus pievels eran uschè entretschads ch'ins ha stuì acceptar la realitad da duas minoritads, ina danaisa en il Schleswig dal sid restà tudestg, ina tudestga en il Schleswig dal nord vegnì danais. Suenter 1949 èn la republica federala ed il reginam vegnids perina da reconuscher vicendaivlamain ils dretgs da la minoritad d'auter linguatg. Ins ha stuì conceder privilegis per segirar la survivenza da gruppas uschè pitschnas. La partida politica da las minoritads (dapi 1948) ha num «Südschleswiger Wählerverband» (SSW, per danais «Sydslesvigsk Vælgefo-

rening», per fris «Söödschlaswiksche Wäälferbänd»); ella n'è betg obligada, sco tschellas partidas, da cuntanscher 5% da las vuschs per vegnir represchentada en il parlament da Schleswig-Holstein. Il SSW na vul dentant esser mo ina partida


etnica danaisa, mabain er ina regionala che resguardia ils Fris.

L'atgna cultura danaisa

Il magazin «The Economist» (Londra) dals 2 da zercladur 2012 rapporta (p.

32): «Il Danemarc finanziescha 50 scolas danaisas ed autras instituziuns culturalas, t. a. ina gasetta bilingua dal di, 'Flensborg Avis' (...). Il Schleswig-Holstein gida a finanziair las scolas (...). Avant dus onns ha sia regenza cristian-

democrata taglià las subvenziuns a scolas danaisas. Il primminister da Danemarc è lura intervegnì [a Berlin] e la chanceliera federala cristandemocrata Angela Merkel ha gidà cun mezs federals. Quella apparenta bagatella ha gidà il SSW a cuntanscher 4,6% da las vuschs tar las elecziuns dal stadi en matg 2012, il meglier resultat dapi 1950.» Las scolas da Risum-Lindholm/Risem-Loonham en la Frisia dal nord èn dal rest trilinguas, pia cun istruzziun er en linguatg fris. Las elecziuns da matg han manà ina coaliziun guvernativa nova. Primminister è uss il socialdemocrat Torsten Albig, anteriur president communal da Kiel; sia regenza cumpiglia autras duas personalitads da sia partida, plinavant duas «Verdas» ed ina selvadia. Tuttafatg nova è la participaziun dal SSW cun ministra Anke Spoorendonk (giustia, cultura ed Europa). Sco commembra dal «Landtag» è Spoorendonk, grazia a sias cumpetenzas linguisticas, s'occupada pli baud da dumondas colliadas cun il Mar baltic. Martin Lorenzen, secretari dal SSW, vul «integrar daplì elements scandinav en la politica», per exempel zavrond ils uffants en scola «tenor il model danais, pir cun 15 u 16, per dar meglras vistas a quels ch'èn disfavourisads». Bjarne Lonborg, editur dal «Flensborg Avis», ha declarà a «The Economist»: «I dat ina gronda differenza tranter la mentalitad e cultura tudestga e la danaisa (...). Nossa identitad è danaisa, e nus essan tuttina in element da la societad da qua.»



Dapi 1949 è il Schleswig-Holstein in pajais federativ da la Germania.